

2  
T 3150/0214.83

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
JUN 15 1939



高平縣志

卷之四

疆域

王者有分土無分民居中以馭侯甸采衛綺交繡錯遠  
近四方夫孰非王土王臣顧山林谿谷天亦有自然之  
限界相其勢度其宜建城郭以統之設官司以守之各  
治其封職有耑屬井然秩然無外之規亦宅民之理也  
國家統一區宇疆域之廣度越古先其詳業著于方畧表  
志諸書高平土宇版章不逾百里而隸天下之脊古稱  
表裏山河實爲壯塞保障一方詎可不辨廣輪而正彼  
此歟爰表列其概以比附禹貢地域圖之遺意書曰申

哈佛大學漢和  
圖書館珍藏印





畫郊圻慎固封守吏斯土者其亦可得之指掌焉志疆域

疆域道里

澤州府北少東九十里 布政司東南六百一十里

京師西南一千七百一十里東西廣九十里南北袤八十

五里統四鄉六坊六廂

東至東韓村接陵川縣禮義鎮界四十五里 陵川縣

治九十里

西至老馬嶺接沁水縣賈寨村界四十五里 沁水縣

治二百里

南至喬村驛接鳳臺縣三家店界三十五里少西至鳳

臺縣治九十里

北至丹朱嶺接潞安府長子縣張店村界五十里 長

子縣治九十里

東南至陵川縣界峯頭舖五十五里

東北至潞安府長治縣界太義鎮五十里 長治縣治

一百二十里

西南至鳳臺縣界大陽鎮四十五里

西北至沁水縣界秋谷嶺五十五里

城池



易曰天險不可升也地險山川邱陵也王公設險以守其國險之時義大矣哉又曰重門擊柝以待暴客蓋取諸豫此相其陰陽觀其流泉載咏于幽居而築城伊滅作豐伊匹大雅之所為歌也高平雖蕞爾邑而垣墉溝壑以定規制以慎周防有其始經即遞有其完繕蓋不睽乎豫之道而金城湯池封內胥固人民社稷所恃以奠安者其在是己是亦有專城之責者所不可不加之意也志城池

高平縣城

宋開寶六年縣令楊咸弼建築土城金天眷庚申縣令王

庭植增築周四里高二丈五尺池深一丈三門東曰東作南曰南薰西曰西成明弘治七年知縣楊子器修嘉靖十九年知縣劉大寶增敵樓四敵臺四十隆慶二年知縣劉堯卿重修角樓敵臺濬濠深廣各二丈又署縣事同知靖四方增高厚五尺知縣李楨重修門樓萬曆二十五年興南道楊應中建議內外甃甃巡撫魏允楨疏請知縣馬從龍王省身先後董其事甃包內外高三丈五尺女墻高三尺五寸濶一丈二尺延袤共一千三百有三丈堞口共一千八百九個上更舖五十二城樓四角樓四增築甕城三郭東記

萬曆二十九年知縣許安遇建西南兩關閣門



崇禎間知縣魯光國增修三門吊橋濬濠

國朝順治十三年知縣范繩祖補修城垣康熙四十四年知縣梅建重修女垣并濬濠雍正六年知縣甘士瑛補修城垣乾隆九年知縣蔣永式補修乾隆十六七年知縣周宜徽修理北城真武樓城樓三門按本縣城垣原屬百里民修各有丈尺石碑爲記如屬某里稍有損壞稟喚該里補修隨壞隨修並無損壞之處每年十月報府

關隘

重關要塞天地之所以限別九州也徑川陵谷之所在

草木蒲葦之所茂明其要害慎固防維所謂杜侵軼之途而扼遠近之吭者從古未嘗不兢兢焉三晉山川險阻輔翼

神京屏蔽齊豫固封疆完要塞謹關梁塞蹊徑誠不獨指邊防凡此疆圉在在須慎高平北臨天黨南通濩澤陵川沁水蹊路阻深保障此方尤宜審其形勢而爲之舉措可口彈丸下邑控扼無多且在德不在險執迂儒之說而忽周禮夏官司險之訓歟志關隘

長平關在縣西北五十一里卽丹朱嶺接長子縣界唐志北有長平關 隋仁壽四年十月丙申詔發丁男數十



萬掘塹自龍門東接長平汲郡抵臨清關度河至浚儀  
襄城達于上洛以置關防

長平秦壁在城西

正義秦壁亦名秦壘今亦名秦長壘

周赧王五十五年秦

使左庶長王齕攻韓取上黨上黨民走趙初秦謂韓與  
秦接壤為腹心之疾乃起兵一軍臨滎陽一軍臨太行  
白起拔野王上黨路絕韓恐使陽城君入謝于秦請效  
上黨之地以為和太守馮亭陰使人請趙王曰韓不能  
守上黨且以與秦其民皆不欲為秦願為趙今有城市  
之邑七十願拜納之趙王喜趙豹諫不聽竟取之秦怒  
令公孫起王齕以兵遇趙于長平趙使廉頗將趙軍士

卒犯秦斥兵秦斥兵斬趙裨將茄六月陷趙軍取二將  
四尉七月趙軍築壘而守秦又攻之取二尉敗其陣奪  
西壁壘廉頗堅壁以待秦秦數挑戰趙兵不出趙王數  
以為讓而秦相應侯又使人行千金于趙為反間曰秦  
之所惡獨畏馬服子趙括將耳廉頗易與且降矣趙王  
既怒頗軍數敗反堅壁不敢戰又聞秦反間之言因使  
趙括代頗將以擊秦秦聞括將乃陰使武安君白起為  
上將軍而王齕為尉裨將令軍中無敢泄武安君者趙  
括至悉更約束易置軍吏出兵擊秦秦佯敗而走張二  
奇兵以劫之趙軍逐勝追造秦壁壁堅拒不得入而秦



奇兵二萬五千人絕趙軍後又一軍五千騎絕趙壁間  
趙軍分而為二糧道絕因築壘堅守

正義趙壁今名趙東壘亦名趙東長

壘在澤州高平縣北五里即趙括築壘自敗處以待救至是時趙用樓昌計媾

秦求和諸侯聞之不復救秦王自之河內賜民爵各一級發民十五以上悉詣長平遮絕趙救及糧食至九月趙卒不得食四十六日皆內陰相殺食來攻秦壘不能出其將軍趙括出銳卒自搏戰秦軍射殺趙括括軍敗卒四十萬人降秦白起計曰前秦已拔上黨民不樂為秦而歸趙趙卒反覆非盡殺之恐為亂乃挾詐而盡坑之遺其小者二百四十人歸趙前後斬首虜四十五萬

人趙人大震 上黨記長平城在郡南秦壘在城西二

軍共食流水澗相去五里秦坑趙眾收頭顱築臺于壘

中因山為臺崔巍桀起今仍號曰白起臺城之左右沿

山亘隰南北五十里東西二十餘里悉秦趙故壘遺壁

舊存焉 坑卒考曰趙括乘勝追造秦壁即今之省窵

谷也其谷四圍皆高山聯絡前有一路僅容車馬形如

布袋趙兵既入戰不利築壘堅守秦因建空倉於西山

以給趙軍趙軍欲出不得括自出搏戰秦射殺之卒四

十萬人解甲降武安君誘入谷口盡坑之

營防嶺在城東十里大糧山下傳為廉頗屯軍之所背峯



面澤有險可憑去嶺百餘步有古戰場

空倉堡在縣西南四十五里接沁水縣界明萬歷三十四年知州賀聖瑞縣令劉應召以空倉兩壁高山中通小徑因立石城一座并寧旅來遠二墩防夫三十名以時巡徼其城堡記曰高平沁水之界有嶺曰空倉勢迫兩山之間中通一線之路盜賊之淵藪行旅之坑穽咫尺之地不復知有王法盜弗去則民弗安官弗嚴則盜弗去是故設之關防嚴之重法後已裁廢乾隆四年五月以地界兩縣山嶺險峻詳請撥防夫三名添蓋舊房給田守險復會沁水同撥夫葺堡給田澤州知府朱立有

碑記

空倉山嶺今土名老馬嶺

金門山在城北五里當壘之門

光狼城在縣西三十里秦白起伐趙取代光狼城括地志

光狼故城在澤州高平縣今名強營村 史記白起攻

趙拔光狼城今聚落尚以秦趙二城為名

故關在城北二十五里秦時置後廢今其里尚名故關

長平城在縣西北三十里北齊置長平郡尋廢後漢志注

泣氏有長平亭史記曰白起破趙長平上黨記曰白起

城在郡南山中百二千里即長平秦壘 晉永嘉三年

劉元海遣子劉聰及王彌寇上黨圍壺關并州刺史劉



現使兵救之爲聰所敗東海王司馬越遣淮南內使王曠將軍施融曹超等將兵拒劉聰曠旣濟河欲長驅而前融曰彼乘險間出我雖有百萬之衆猶是一軍獨受敵也且當阻水爲固以量形勢然後圖之曠怒曰君欲沮衆耶融退曰彼善于用兵曠闇于事勢吾屬今必死矣曠等踰太行與聰遇戰於長平間曠兵大敗融超皆死遂破屯留長子斬獲萬九千級上黨太守龐淳以壺關降

高平南高原周顯德元年二月比漢劉旻攻潞州三月乙酉世宗如潞州以攻漢壬辰次澤州閱兵于北郊癸巳

及劉旻戰于高原敗之追及于高平又敗之丁酉幸潞州己亥侍衛馬軍都指揮使樊愛能步軍都指揮使何徽伏誅 正月丙申世宗卽位劉旻遣使于遼二月遼

遣武定節度使政事令楊衮

遼史政事令邪律敵

將鐵馬萬騎及

奚諸部兵五六萬人號稱十萬來會于晉陽旻自將兵三萬以白從暉爲行軍都部署張元徽爲前鋒都指揮使與遼兵南出團柏丁巳屯梁侯驛周昭義軍節度使李筠遣牙將逆戰於太平驛張元徽斬昭義將穆令均筠遁歸上黨三月旻兵逼潞州引而南世宗曰劉旻少我謂我新立而國有大喪必不能出兵且善用兵者出



其不意吾當自將擊之馮道等諫怒卒自將擊旻癸巳前鋒與旻兵遇於高平南之高原旻兵少却諸軍亟進旻以中軍陳于巴公原張元徽居東偏楊衮居西偏周師亦列爲三陣李重進白重贊將左樊愛能何徽將右向訓史彥超居中央張永德以禁兵衛帝帝介馬自督戰楊衮望周師曰勅敵也未可輕動旻奮髯曰時不可失請公勿言衮怒而去時東北風方盛而遽轉南風旻副樞密使王延嗣使司天監李義白云時可戰矣旻號令東偏先進王得中叩馬諫曰義可斬也南風勢急非北軍之利宜少待旻怒卽麾元徽戰元徽擊右軍兵始

交周樊愛能何徽引騎兵先進右軍潰步卒數千人棄甲降旻元徽呼萬歲聲振川谷周兵大駭帝赫怒躍馬入陣引五千人直衝旻之牙帳旻方張樂飲酒示閑暇及周兵奄至驚惶失次帝親犯矢石督戰士士奮勇爭先馬仁瑀馬全義及永德等直前旻趣元徽進兵會元徽馬蹶爲周兵所殺旻軍氣奪旻自麾赤幟收軍軍驟退不能止互相蹂躪遂大敗日暮守餘兵萬人阻澗而守是時劉詞將周之後軍戰已勝而詞軍繼至復乘勝擊旻兵延嗣戰死旻又大敗輜重噐甲乘輿服御皆爲周所獲丁酉帝至潞州旻自高平被褐戴笠乘契丹所



贈黃騮率百餘騎由雕窩嶺間道驅去夜失道山谷間  
得村民爲鄉導誤趣晉州行百餘里乃覺遂殺導者晝  
夜兼行所至得食未舉箸或傳周兵至倉皇而去旻衰  
老力憊伏馬上馳驟殆不能支僅得循他道以歸是役  
也衮畜怒按兵西徧不進故獨全軍而返

石壁關縣東二十里魏庄西大石坡

米山鎮堡縣東十里 建寧鎮縣東四十里 玉井堡縣

南十里 丁壁鎮堡縣南三十里 野川鎮堡縣西二

十里 馬村鎮堡縣西三十里 唐安鎮縣西南三十

五里 周纂鎮堡縣西南四十里 寺庄鎮堡縣北二

十里 趙庄堡縣北四十里 換馬鎮堡縣東北四十

里

驛埃舖遞

置郵傳命所以道達四方期會教令也掌之天府董之  
官司量其地里之遠近限以時日嚴其點刷稽遲者有  
罰蓋自漢唐以來立法遞詳飛符走檄譬諸一身血脈  
流貫詎非經國之要務歟遞馬舖兵軍邊塘路有其衝  
僻損益因時非惟關會之地徒司詰辨而已高平雖非  
九達之衢而晉豫所臨南北交出規方設傳隨傳遞文  
亦區疆畫表者所宜加意也爲志驛埃並舖遞



長平驛原額應差所夫七十八名歲支工食銀五百五十四兩四錢七分零雍正三年裁夫十八名十年裁夫二十五名裁減工食銀兩俱解冀寧道實在驛應差所夫三十五名歲支工食銀二百四十八兩八錢三釐零按季支發

喬村驛不設所夫以長平驛所夫應差向例駐劄高平縣南關凡應付差使南接鳳臺縣九十里北送長子縣九十里

長喬兩驛每驛原額馬三十八匹馬夫十九名歲支工料銀一千二百六兩雍正五年裁馬二十六匹裁夫十三名每驛留馬二十五匹夫十二名半乾隆二年撥濟李家溝三匹韓家樓二匹乾隆二十二年撥濟甘桃驛二匹又撥岱岳十二匹史村驛五匹普潤驛一匹泓芝驛二匹瑞石驛二匹共分撥各處馬三十四匹今實在驛應差每驛止存馬十匹夫五名撥馬工料銀向解冀寧道請領乾隆三十五年改解司庫

墩臺

南關汛 在縣治南廂

南陳汛 縣治南二十里

喬村汛 縣治南三十里



寺庄汛 縣治北二十里

長平汛 縣治北三十里

鴉兒溝汛 縣治北四十里

以上各路墩臺望樓係雍正十二年奉 憲頒式改建及增設脩築

鋪遞

高平縣共八鋪鋪司兵共三十三名每名工食銀六兩每年共工食銀一百九十八兩

總鋪縣西廂 五名 玉井鋪縣南十里 南陳鋪縣

南二十里 喬村鋪縣南三十里接鳳臺界 臨丹鋪

縣北十里 西陽鋪縣北二十里 范店鋪縣北三十

里 鴉兒鋪縣北四十里接長子縣界 以上每鋪四

名

東北經換馬村至長治界太義鎮五十里南至鳳臺界三家店四十里北至長子界張店鋪五十五里此孔道也東經朱庄村十五里又三十里至陵川界禮義鎮西由馬村鎮三十五里又十里至沁水界賈寨村此小徑也

里甲市集

邑啟四封村落有疎密道里有遠近綿亘錯雜其散處



於山谷原隰間者固王者所以安輯斯民俾之休養生息以樂生而送死也黨師所屬比閭相聯烟火相望宅爾宅田爾田食舊德而服先疇豈惟是保聚無他亦期禮讓相先日臻淳古耳高平四山環繞民生樸茂沐國家涵煦之德滋生繁盛雞豚里社鄉鄰風俗之美行可見矣若夫日中為市朝夕有求山林城闕一也地無異產民安儉約惟是畎畝衣食之需各得其所已矣要亦採風者所不可不審也爰次里甲市集附焉

崇禎年間潞安府通判署高平縣事董良瓊奉旨歸併一百里

舊額一百六十一里迨崇禎壬申癸酉寇紛於境兵擾於鄉兵荒之後疫癘流行斃斃子遺十室九空矣九年當編審均徭適良瓊至首併里甲歸為百里不分里長甲首輪流應役以甦民困每里務足十甲每甲人丁均勻照例定為九則每則差銀不等實

在六萬二千二十五丁符於原額

在城六坊

招賢坊

在縣西梓城鐘樓巷因里有常御史故名

儒林坊

在儒學巷

雙桂坊

在書院巷因里中有二登科者故名

治平坊

在南門內稅課局故名

孝行坊

在石佛頭成化八年造册時縣公崔璘聚招賢儒林二坊零戶增立因孝子王起孝旌表門在

故名



節義坊

在縣東梓城亦成化八年造册時增立因其坊中有義民邢琰節婦李氏旌表門在故名

三關六廂

南廂東

在南關阜民街東

南廂西

在南關阜民街西

南廂南

在南關南頭 舊有李遊仙坊牌萬歷七年廢

南廂北

亦成化間合南廂三里零戶增立在城中觀巷

東廂

在東城外

西廂

在西城外 舊有北廂成化八年增立在城中東梓城歸併去

五鄉 豐溢

長平

舉東

舉西

都善

三十三都八十八里

第一都五里

李村東

在縣東北庄六南李村北李村盧家山趙家山響水坡朱家庄

李村西

在縣東北庄二徘徊村店上村

徘徊南

在縣東北庄六徘徊村池則村姬家山村王家山村朱家庄陶溝

徘徊北

在縣東北庄五赤祥村王家北山村陳家北山村劉家北山村南河庄

團池南

在縣東北庄六團池村三甲村靳家庄部家庄溝北村張家庄 舊有徘徊西在縣東北庄三

南河庄三甲村靳家庄併去

第二都三里

團池北

在縣東北庄五團池村東沙院西坡村車院村西沙院

中太里

在縣北庄五中村河西村李家庄申家庄大河西村



長受里 在縣東北庄五邢村長受村北庄張家庄姬家庄  
舊中太分東西里今歸併庄村張家庄姬家庄

第三都三里

魏庄東 在縣東北庄二十一王村魏庄南河村東魏庄  
西魏庄王家村果角村藏造村宋家村關頭村

魏庄西 在縣東北庄十下台村邱村西栗庄老槐樹庄  
東郝庄西郝庄王家北山村紅廟村石壑村石

故關里 在縣北庄九故關村長畛村口則村換馬村庄  
裡村李家庄嶺東村東沙院邱村 舊有中太

南庄一西栗庄永寧里庄七邱村石沙院  
村吳家庄李家庄東郝庄西郝庄俱歸併

第四都三里

陳堰南 在縣東北庄十二陳堰村柳樹底村王家圪陀  
村任家庄西陳堰村上張家庄底張家庄沙院

陳堰北 在縣東北庄十二部庄山王庄宋家村王家庄  
安河村閆家圪塔村東窰頭村關家村中庄北

趙庄牛家 趙庄牛家  
庄西窰頭

石村西 在縣東北庄八石村鉄炉村香山村王家河水  
溝村營裡村河西村北頭村 舊有陳堰中庄

二香山 二香山  
二河西村庄裡村俱歸併

第五都三里

府下里 在縣東北庄四郭庄東  
府底村西府底村蘇庄

勾要東 在縣東北庄四張壁村  
圪陀村底陽村後庄

石村東 在縣東北庄九石堂會部庄南頭村大山村黑  
土坡村姬家庄西山村牛家庄底陽村 舊有



部庄里庄一部庄又府下分東西今俱歸併

第六都二里

建寧前

在縣東北庄十三李家河村黃窰村王家庄何家村張家庄東吳家村陳家河土橋頭村馬嶺村西圪套村苟家村

建寧後

在縣東北庄七建寧鎮東神頭村曹家村北社小玄村馮庄張家庄 舊建寧分東西南北中後併去

第七都四里

城西南

在縣西庄七困頭村小韓庄李家河後河村庄則村尚庄南溝村

王何里

在縣西北庄七市王村王何村張家庄南溝喬家溝北村北溝村

城西北

在縣西北庄三王庄王何東街北溝村

第八都四里

王降里

在縣西北庄四王降村南溝村洞上村喬家溝 舊有王何分南北併去

城北里

在縣北庄五城北村馮庄李家庄段庄小馮庄

臨丹南

在縣西北庄五箭頭村秋子村永祿村錦上村東山村

臨丹北

在縣西北庄十二圍城村叅村後溝村段家溝村東王寺村西王寺村邊家溝石門村葉甲院張家坡邢家坡圪套村地臨丹水故名秦趙陳兵之地

永祿里

在縣西北庄七永祿村東庄許庄黃兒溝上扶村泉則頭扶石村居民造紙為業 舊永祿分南中併去

第九都三里

寺庄東

在縣西北庄一寺庄鎮



寺庄西 在縣西北庄十二伯方村王報村馮家庄西河

山南後溝 長裡村

永祿北 在縣西北庄七西陽村堡頭村上扶村扶石村

望雲村東庄後河村 舊有王報南庄一王報村相傳為泫氏縣故址泫水出其右又西陽里庄一西陽村俱歸併

第十都二里

王報北 在縣西北庄二王報村楊家庄

高良東 在縣西北庄五釜山村賈村高良村東曲村李家河 舊有王報中庄一王報村釜山西庄三釜山村德駟村

遷奪掌俱歸併

第十一都二里

草方里 在縣西北庄十四草方村鹿宿村河坡村賈家庄十善村鴉兒溝北趙庄小回溝傘蓋村靖居

柳村里

村柳村柳村庄 掘山村木棒村 在縣西北庄九柳村德駟村管寨村北王庄馬家溝盧庄長平駟掘山村南峪村 舊有德義里庄三長平駟德駟村掘山村又王庄里庄三盧庄東溝村管寨又草方里分東西俱歸併

第十二都二里

楊村里

在縣西庄七小野川尹家溝背裡村喬家溝柳樹底南楊村北楊村居民種葦織蓆為生

西社里

在縣西北庄二十九杜寨村上西社下西社寺溝村郭庄吳庄棗河灣東凹村西凹村秦家溝范家嶺坨台村尖平村神頭村後溝村香庄榆樹坪風兒背王家村寺西庄郭家坨十字嶺南坨腦基凹村溝底村牛家村長裡村小溝村坨塔村 舊有高良西庄五坨台村東曲村西曲村東窪村西窪村又楊村 分南北西社分南北俱歸併

第十三都四里



趙庄西 在縣東庄四趙庄溝北村秦庄東山村

趙庄中 在縣東庄七張庄南庄石橋口趙庄正水溝果則溝龍王溝

米山西 在縣東南庄一截米山鎮西一截

米山北 在縣東南庄四米山鎮王家庄司家庄張家庄舊趙庄東庄二南庄石橋口歸併

第十四都三里

朱庄里 在縣東南庄七宋庄司家庄窪村窪溝村賀崗村南坡村西溝村

南庄中 在縣東南庄六南詩午井則溝張壁村山秦村賀庄南庄

米山東 在縣東南庄六米山鎮南坡村上馮庄下馮庄北朱庄王家庄舊馮庄里庄二上馮庄下馮庄又朱庄分東西歸併

第十五都五里

南庄東 在縣東南庄六北詩午南詩午北埭村冶子溝西溝村侯家庄

南庄西 在縣東南庄七北朱庄南山村東南庄嶺兒頭後河村南圪塔村窪站村

裴泉東 在縣東庄十一裴泉村東山村柏山村東河村東迷村河東村上村獅子口裹角村管泉向陽村

裴泉西 在縣東庄六裴泉村南河裡梁家河西頭坡底村李家河村

勾要西 在縣東北庄五勾要村吳村南坡村南溝村成家山

第十六都三里

詩村南 在縣東庄六董庄北詩村秦家庄南詩村盧則溝小詩村

詩村北 在縣東庄六東韓村南村韓村北詩村坑董村南坑上

韓村里 在縣東庄六中村庄裡村長吟村韓村東庄裡南村舊有話壁里庄四南村北村長吟村庄



裡村又韓村分  
東西俱歸併

第十七都二里

平頭里

在縣東庄六平頭村寨平村  
郝庄丹水村圪嘴村龍尾村

龍尾里

在縣東庄五龍尾村侯庄丹水村姬萬村北張  
寨舊平頭分東西龍尾分東西張寨里庄一

張寨村  
俱併去

第十八都二里

沙壁里

在縣東南庄五上沙壁下沙  
壁西靳寨畢家院東靳寨

石末里

在縣東南庄四石末村龍泉村吳庄南張寨乃  
燒石嶺之末故名 舊有晁山北庄一晁山村

舊志有名晁會者為一時聞人晁山之名意者  
山以人重乎又龍泉里庄二龍泉村吳庄里有

龍溪橋故里以龍名又沙壁分  
南北石末分南北後俱歸併

第十九都四里

野川東

在縣西庄七野川鎮小野川喬家溝  
下馬遊崔家灣西溝村後山溝村

野川西

在縣西庄九東溝村蒲溝村盧家村唐家  
山野川村后溝村馬遊村皇王頭常家溝

玉井里

在縣西南庄八唐庄梨園村瓦窰頭長  
裡村南溝村中溝村後溝村路家村

瓌庄里

在縣西庄六瓌庄南韓庄西溝村南頭村新庄  
圪套村 舊有野川北庄一常家溝併去舊唐

庄有唐千戶置  
庄於此因名

第二十都二里

南陳南

在縣南庄六南陳村北陳村前  
小山後小山司家村

南陳中

在縣南庄七許庄北陳村懸壺南南嶺村北嶺  
村回山村煤窰庄 舊有北陳西庄一北陳村

按南陳北陳乃宋石守信破李筠之處陳師翰  
旅故曰南陳北陳又回山北庄三回山村懸壺



南南嶺村又南陳  
分南北中俱歸併

第二十一都二里

東宅里

在縣西南庄九東宅村東周纂大周纂西掘  
山東掘山下崖底回山村溝頭村東牛庄

回山里

在縣西南庄六東宅村北街西周纂大周纂金  
章背東牛庄西牛庄 舊有古寨南庄二太周  
纂古寨村又東宅分東  
西回山分東西俱併去

第二十二都二里

馬村里

在縣西南庄  
一馬村鎮

唐安里

在縣西南庄六唐安鎮古寨村庄頭村閣老窩  
武家掌窪則頭 舊有古寨北庄一古寨村其  
地居空倉嶺下與沁水接界又馬  
村分東西唐安分東西俱歸併

第二十三都二里

通義里

在縣西庄五梁扈村南  
庄交河村畢家庄張庄

馮村里

在縣西庄十一馮村北山村西溝村上董峯下  
董峯東掌裡西平上窪則頭原村小城地山村  
舊通義分南北西  
馮村分東西俱併去

第二十四都三里

陳庄里

在縣西庄六陳庄原村常  
庄上馬遊下馬遊牧溝村

神山里

在縣西庄二  
康營村陳村

原村里

在縣西庄一原村 舊神山分東西原村分南  
北俱併去又原村漢原氏居之故名神山因民  
艱於水嘗取汲於原村  
河故山嶺有神山廟

第二十五都三里

龐村里

在縣南庄四川底村  
下韓庄龐村北蘓庄



龍曲南

在縣南庄四上韓庄上玉井下韓庄玉井村

龍曲北

在縣南庄五龍曲村橋北村圪塔村隨庄崔庄舊玉井東庄一玉井村龐村分東西俱併去

第二十六都四里

宰李里

在縣南庄一宰李村因李文簡公為宰故名

北陳里

在縣南庄二朴村宰李村

河西東

在縣南庄一河西鎮

河西西

在縣南庄三河西鎮鞏村喬村舊宰李分東西併去

第二十七都三里

叢桂里

在縣南庄二下庄牛村有七賢祠元高平令郭質重修其祠記畧曰金明昌正大間相繼擢第

者七人悉叢桂同里士也進士趙淇其子楠官工部侍郎伊陽令盧洵其子太平簿茂張僕射

國綱其侄為許州御史播而李茂華亦與簡選

列夫一里七桂且橋梓登庸叔侄媿美嗚呼盛哉因飭七賢祠於村麓之乾闥名曰

叢桂里庄四牛庄下庄新庄劉庄

仙井里

在縣南庄二仙井村南蕓庄仙井昔李游仙居此宅有井故名

仙井南

在縣南庄二新庄焦家河舊有焦家河庄一焦家河又叢桂分南北俱歸併

第二十八都三里

李門東

在縣南庄七東李門西李門庄裡村黃家溝南坡村窰則頭邵家平

李門西

在縣南庄八朱家庄牛家庄劉庄瓦窰頭橋裡西李門寨上村舊有李文簡公門故名

劉庄里

在縣南庄四劉庄杜村常樂村小仙井舊有長安里村名常樂又劉庄分東西俱歸併

第二十九都二里

雙井里

在縣東南庄八雙井村王家庄溝南村東李家庄西李家庄郭家庄椿樹村丁壁村昔有二井



晁山里 廢今  
在縣東南庄七劉家村庄則上細窰村南凹裡  
北凹裡丁壁村晁山頭 舊有了壁里庄一丁  
壁鎮雙井分  
南北俱歸併

第三十都三里

董寨里  
在縣東南庄五東山村楊家庄三五  
溝大片村北庄昔皆屯兵處故名

郭村里  
在縣東南庄四郭  
寨官庄董寨郭村

孝義里  
在縣東南庄二孝義村石嘴  
頭 舊董寨分東西歸併

市集  
現在日期與舊異

南關 西關 東關 俱三六九日  
米山 二五八日

寺庄 一四七日  
河西 馬村 徘徊 建寧 俱一四七日

野川 二五八日  
原村 三六九日  
周纂 二五八日

下臺 二五八日  
陳堰 一四七日

按自秦設郡縣貌茲一邑即古百里侯封也雖或犬  
牙相錯而分域定界各據井疆繭絲保障司土者無  
越畔之司寔有官守之責相形勢以築城濬隍辨阨  
塞以防患禦侮驛舖流通聲應氣接四郊閭里室家  
相保耕鑿相安其所以承流宣化俾斯民不識不知  
順帝之則良必有道矣撫疆隅而流覽封內一家也  
斯民父母其日有綢繆也夫



高平縣志

卷之五

山川 形勝

自山海著經嶽瀆並誌兩間流峙肇見簡篇嗣是禹別九州山川奠父尸倭綜其險阻裴秀列以輿圖他若郭璞傳經道元注水支分派衍量高測深作等列眉述堪指掌矣太行雄視寰宇高平漳水不在高平環境皆山漳水丹河淵源自出匪止一邱一壑足供憑眺已也爾乃高峯四列中有平原上黨藩維實稱阨塞秦趙而後唐周以還幾作戰場猶存故壘惟此山川足名形勝方輿載考爰列志之



山

發鳩山縣西北五十里為邑祖山淮南子作發苞山山海經曰發鳩之山其上多柘木有鳥名精衛相傳炎帝少女游海溺死化為鳥常取西山木石以填海每夕常聞風雨聲明月不輟畢氏曰五鳩少昊臣元魏有五鳩墓按發鳩山踞邑西北其形甚遠凡邑之西北諸山名雖不同實皆發鳩前後左右之峯巒耳鳩山暮雨八景之一

丹朱嶺縣北五十里接長子界舊志以堯封長子丹朱得名漢書曰長子周史辛甲所封顏師古注長讀長短之長今俗為長幼之長非也田氏曰丹林訛為丹嶺而朱

後人妄加耳

仙公山縣西北四十五里相傳張果老過此

傘蓋山縣西北四十五里舊志以形似名畢氏曰散宜菟

取散宜氏今高平散蓋訛傘 按商蓋殷侯國周公勝

殷將攻商蓋辛甲曰難攻請先九裔而商蓋敗謂今高

平蓋州是然則傘蓋疑商蓋之訛耳

鳳頭山縣西北四十里即發鳩山巔形如鳳頭屹立乾地

遙望縣城里人建元帝廟以障縣治之缺

釜 山縣西北三十里形如覆釜

五龍山縣西北三十里一名鳳翅山相傳慕容永時有五

此說甚唐



色雲見

走馬嶺縣西北十五里有鉄鑛

浩 山縣西四十里一名石朶山峰似花朶西南爲老馬嶺接沁水縣界

董峰山縣西四十里馬仙姑鍊形處有石榔

頭顱山縣西五里秦白起坑趙降卒四十萬唐元宗收頭顱葬於此建廟有司春秋祀之 一統志頭顱山在高

平縣西南水經注秦坑趙衆收頭顱築臺於壘中因山爲臺崔巍桀起今仍號曰白起臺一統志又載髑髏山引據寰宇記在高平縣西五里晉永嘉中劉聰舉兵積

屍爲髑髏山按今止一山積屍之說蓋附會耳

金峰山縣西郭三里上有先月亭邑人多別業爲游覽地

金峰夜月  
八景之一

空倉山縣西南四十五里秦白起詭運米置倉於此以給趙括舊建巡檢司城

吾 山縣西南四十五里接澤州境三峰聳翠夕照倍佳卧佛山縣西南三十里山凹有萬月亭

懸壺山縣西南二十五里形似懸壺

游仙山縣南二十里金李游仙通敏讀書於此嘗啟地得古鐘聲徹山下數十里後年百歲終里人名里爲游仙



坊山亦名游仙山 游仙曉鐘 八景之一

龍從山縣東南二十里山形崆葱喬松摩雲相傳登巔可

望黃河

好妨嶺縣東十里旱蝗祭於此

米山縣東十里趙將廉頗積米於此土人名大糧山 大糧

積雪八景之一

七佛山縣東七里高出群山左右環河 即東西長河

羊頭山縣東北四十里接長子界舊志云上有石狀如羊

頭田氏曰羊頭山在太行之北百五十里山最高俯視

太行猶在下也危峰插霄日夕諸山俱暝而此峯返照

猶光以地勢高山益高耳山東南相傳為炎帝陵石甃

尚在 按山麓遶數十村圍三大邑東北長治西北長

子正南高平 羊頭夕照 八景之一

龍王山縣東北三十五里上有石佛洞三教洞子孫洞鑿

石為渠寒泉漱玉滙為溪流昔人每觴詠於上

舍利山縣東北二十五里

翠屏山縣東北二十五里層巒秀巘回互如屏

穀遠山縣東北二十里羊頭山之次產紅嘴鴉

蓮花山縣東北十里迴峰曲嶂中有石如蓮花

朗公山縣北三十里上建朗公廟朗公倉頡也路史謂史

倉頡非神 史記



皇神農後神農已作穗書書與穗相因起

石室山縣北三十里土人作石室且常見五色雲晡散相

傳有寶氣石室朝霞  
八景之一

牛心山縣北三十里產石温潤可硯

韓玉山縣北十五里山形特起上平地數畝俯瞰群山如

培塿然相傳秦圍韓王於此縣治藉托之主山也

水

丹水源出丹朱嶺西麓丹朱即發  
鳩山脊在縣西北五十里水東

北流又屈而東南會絕水又南行二十餘里繞縣城北

又東南流注於丹谷入鳳臺縣界 山海經曰沁水之

東有林焉名曰丹林丹水出焉即斯水矣此丹水  
上源水經

注水出上黨高都縣故城東北阜下俗謂之源源水地

理志曰高都縣有莞谷丹水所出東南入絕水是也此丹

水下流按此於丹水源流未明司昌  
齡有說見後 丹水秋波八景之一

絕水源出縣西北四十五里傘蓋山在仙公  
山南又名浮雲河

水東南流經傘蓋靖居兩村約八九里會丹水東南流

繞縣城又南流合泣水 水經注絕水出泣氏縣西北

楊谷地理志曰楊谷絕水所出東南流左會長平水源

縣西北又東南遶泣氏縣故城北又東南與泣水會俗

云秦軍築絕不令趙飲故云



泫水源出縣西北三十里五龍山合縣西二十里原村之  
原潔泉東南流經許庄又名許河至縣東南合丹水  
水經注泫水導源泫氏縣西北元谷又東南經泫氏故  
城南東會絕水亂流東南入高都縣右會丹水會下流之丹水  
司昌齡丹水源流說

丹水之源其說不一愚以謂出發鳩山者爲正發鳩  
邑西北祖山其形甚遠而丹朱嶺則山之脊也其水  
之南流者爲丹北流者爲漳丹朱嶺南一峰東峙名  
曰鳳頭一峰南迤名曰仙公仙公之北鳳頭之西深  
澗有泉土石及沙皆作赭色說者謂卽丹水之源行

十餘里至北趙庄西而丹嶺石罅之水北來與之合  
其流漸大又南行三里許至掘山村西北卽與絕水合  
矣故或謂源出丹朱嶺或謂源出仙公山要之皆發  
鳩耳由是西南行而抱長平驛經王報村繞臨丹舖  
南下至省冤谷口忽折而東環縣城東北隅又南行  
二十餘里至河西鎮東南而與泫水會焉於是三水  
合流又東南至成公村入鳳臺界此丹水之源流在  
高平境內者然也其在鳳臺境內者則堯谷之丹水  
也在今高都鎮一名源源水一名源澤水一名源漳  
水出自東北之可寒山西合泫水又南合白水入硤



石山中曲折行百餘里出太行山口而隋因以丹川  
名縣此丹水之源流在鳳臺境內者然也或疑高平  
之丹水源出丹朱嶺其流微鳳臺之丹水源出可寒  
山其流盛本非一脉然源出丹嶺之水實注於高都  
之莞谷會同爲一故丹之名不易焉而莞谷亦名丹  
谷蓋在高平境者丹水之上流也在鳳臺境者丹水  
之下流也前人渾言丹水而不辨其有上下流之分  
言源出丹嶺者則不下及夫高都之莞谷而言莞谷  
之丹水者又不上溯夫出發鳩之自始舉其一截遺  
其一截均之未悉乎丹水之全形也夫發鳩爲邑之

祖山而丹亦爲邑之主水故特考其源流本末而爲  
之說若其既出太行合沁水入黃河又有小丹河通  
漕運則別見前人圖記茲不具詳

按丹水出丹朱嶺西麓絕水出傘蓋山泣水出五龍  
山丹水自源東北流又屈而東注至掘山村西會絕  
水由是而南行至省窳谷口

在縣北  
五里許

又折而東流繞

縣城北至城東北隅又南流至河西鎮東南泣水注  
焉又東南行經杜村南入鳳臺縣界此現在之源流  
也他書所載紛紛互異惟培蔭李君丹水源流說爲  
是但篇中所云經傘蓋靖居兩村則是以絕水爲丹



水而絕水則竟無矣夫以爲竟無絕水彼水經注所言丹水又曲而東注左會絕水暨地理志所稱絕水東南流左會長平水俱無着落因携素經行之士吏親陟發鳩之巔見此山綿亘西北其形甚遠丹朱嶺西南一峯名仙公分一支斜東南下卽所謂鳳頭山鳩山寺一帶也陽有一泉東南流卽絕水北有一泉覺南泉更帶赭色水向東北流又曲而東行經河坡草方二村由小會溝出自源約十數里至掘山西會南泉之絕水於是恍然曰是卽丹水之源也以此爲丹源不惟與水經注合且絕水西南小山有泉類瀑

布東南流與絕水會蓋卽長平水也是又與地理志相符卽揆之靜山司公之源流說亦不相逕庭故不惴愚昧直指此爲丹水之源畧錄他書與現在之稍符者一二條以發明之其是與否姑存其說以俟請質於博聞者

長平水在縣西北水經注長平水出長平縣西北小山東南流逕其縣故城泣氏之長平亭也

長河源出縣東北四十里羊頭山西南分流入丹水河渠迤邐環帶縈紆而七佛山界其中故有東西長河之別春夏漲溢冬涸



天王池在縣城集賢橋西水族不生今涸

淵靈泉在七佛山下禱雨多應宋賜號淵靈

定林泉在米山定林寺山穴湧泉似噴珠飛玉可池可軒

舍利泉在舍利山下一泓澄然汲之不涸

玉女泉在韓王山玉女祠土人禱雨於此

金龍泉在縣北二十里團池村相傳二魚時躍於泉遇雨

即飛去今名蓮花池

原潔泉在原村周四丈深一丈五尺極清甘冬温夏凉

濟瀆池在縣西五里骷髏村濟瀆本在懷慶鄉民於此建

廟三月十八日祀

五龍池在五龍山下禱雨多應

玉泉谷在縣西南三十里石壁嶙峋下有清泉从巖曲徑

林木幽異

鴉兒溝在丹朱嶺南宋慶元間通志作金明昌間老人張勝者多

善行家溝之南麓日夕羣鴉集屋驅之不去子孫繁衍

因名其溝

形勝

左帶翠屏右阻倉嶺游仙朝其南羊頭鎮其北舊志

秦晉唇齒河朔咽喉題名記

四面皆山中有平地方輿勝覽



太行險固東洛藩垣舊志

層山環抱曲水縈流砦堡皆險阻之區高平悉耕鑿之地

舊志

### 古蹟

古人不作往蹟易湮變幻無端風流有盡舊時燕子來  
非王謝之堂此日秋風吹豈漢唐之樹然而羲皇雖邈  
陵谷未遷峴首碑存每教人民墮淚柱頭鶴返還歌城  
郭依然豈惟臺峙通天表呈沈炯妓荒銅雀賦愴陸機  
凡此山川每稱古昔摩娑斷碣歲月可稽零落殘基代  
人未泯母云陳迹足深吊古之思苟想遺踪應著信今

### 之錄志古蹟

神農城在縣北四十里羊頭山田氏嘉穀按寰宇記曰神  
農嘗五穀之所上有神農城下有神農泉後魏風土記  
云神農城在羊頭山其下有神農泉山上有古城遺址  
神農井在古城下六十步有二泉左泉白右泉清側有井  
所謂神農井也

五穀畦在神農泉下地名井字坪有田可種相傳神農得  
嘉穀於此始教播種謂之五穀畦焉羊頭山拒黍出此  
明鄭藩朱載堉上拒黍辨云臣謹按拒黍律家特重羊  
頭山者神農播五穀以是爲名區



泣氏故城在縣西二十里竹書紀年晉烈公元年趙獻子城泣氏後魏析置高平今王報村猶稱舊縣

趙鄆城括地志趙鄆故城一名都尉城今名趙東城在縣西二十五里又有故穀城王齒攻趙陷趙軍取二鄆四尉此二城即二鄆也

都向二城冀州圖云在今縣西三十五里秦据西城趙守東城

省冤谷白起坑趙軍處在長平驛以南王報義庄等村舊名殺谷唐志明皇幸潞更名金皇統元年邑令王庭直有省冤谷掩骼記城西北十五里有地曰殺谷乃秦將

白起坑趙卒之所細視其跡於長脛骨間存銅漆矢一入骨寸餘因出矢而揜之

棄甲院在縣北塾頭王庄等地趙降軍棄甲處農人掘地多見髑髏人骨及銅製戈頭箭頭蓋趙軍所棄也李賀長平箭頭歌漆灰骨末丹水砂淒淒古血生銅花

長平亭後漢志泣氏有長平亭

羊頭城魏志泣氏有羊頭城

王叔和藥碾在王寺村今土窰石碾俱存

高平城北魏志永安中置高平縣治高平城

周世宗戰場在縣南三里橫澗橋外周世宗敗北漢王劉



旻於此俗名輸場

高華府在縣東四十五里即建寧鎮唐高宗開府於此開

元初廢按唐高華府在晉州乃居府兵之地澤州五府

丹川永固安平沁水白澗皆不名高華當由高都誤傳

舊志云今其地近建寧者猶稱府下盖亦有所自

盖州故城在縣東十里即今米山鎮唐武德初置天寶間

廢

唐武少儀移丹河記碑在縣治儀門外記見藝文

宋文廟孔子畫像碑在學宮元祐三年奉議郎權知高平

縣事張持記並書立石按記云吳道子畫孔子為魯司

寇像二本乘車而群弟子從者謂之圖立而顏淵侍者

謂之小影司門郎中王伯瑜傳小影於仙源孔氏盖孔

子四十七代孫襲封衍聖公蒙之所藏也刻棣州學中

高平建學做州像摹於廟壁古今聖像獨此為真

靜居院在靜居村宋西京致仕張郎中故宅有四堂彝心

會徵清白金蘭韓魏公琦嘗題詩寄美

賈魯宅在縣西三十里今長平驛楊村宅材悉取治驛亭

矣

益國鐵冶在縣西十里王降村元大德年置至正中廢明

洪武初徙治縣北二十里永樂中勘合罷爐冶事今址



存

九鷺圖在縣治儀門內明呂紀取君子九思之義繪九鷺而爲圖邑令李楨得之立說勒石以爲後之考鏡今并附焉說云昔箕子演洪範九疇至五事之思曰思曰睿睿作聖故後言聖功之本者莫大乎思孔子曰君子有九思天分九野地封九州人列九行九之時義大矣哉思以九則身心之道備身心之道備而天下之能事畢矣故後言體三才之撰者亦莫大乎九思馳其心於無何有之鄉者不知思者也役其心於無可奈何之衝者不能思者也形聲象貌皆理可觀動植飛潛皆思所寓

而況於人乎况於聖乎余嘗弄丸餘暇得九鷺圖而玩之或仰而視或側而聽或潔白而色或竦立而躬或翼趨而進或戛然而鳴或翔審而集或奮棘而驚或旣宿而食泛清流而暢其情此何爲而作也信可以佐圖書而右箴銘大傳曰天下何思何慮孟子曰心之官則思君子觀象而近思焉則卽思可以畫卦轉蓬可以造輪一物一事適心之用三才之理得而其於九鷺圖之說誠思過半矣

勞勞亭在喬村驛南界牌嶺鳳高兩縣接境處萬歷初縣令李楨建歲久傾圮乾隆三十八年重修立有碑記

見記



藝文

五音洞在舍利山下唐僧大愚公審音於此洞中嘗聞五音之聲卽華嚴經中三十六字母之始音

今照舊出三日  
日之三白未嘗  
寧也

風 洞在縣東南十里許山坡一孔風生出恒三日入恒

三日邑令楊子器恐駭俗堙塞之今以龍神覆其上

黑龍洞在朗公山下深數百步中有寒泉冷侵人骨旱則

禱雨於此

水利 橋梁

自元圭載錫河瀆安流生民之利賴宏矣疏決排注相其高卑量其緩急經畫得宜凡此波臣胥資沾益願西

北水源多藏山谷漲涸靡常蓄止蕩均之法益有難焉

者苟無治人民奚被澤高平山水縈迴導引疏防昔人

行有成效引而伸之當非紙上陳言若乃地無舟楫駕

壑成梁以濟不通司理所掌亦川澤之事也爰志水利

橋梁附焉

水利

舊志長河在縣東北南流入丹水可資灌溉

唐貞元七年屯留令明濟假領高平引丹水遶城臨河植

柳建亭並立水神祠武少儀爲文記之

張四維河內縣河渠記沁水自太行南出由枋口而東會



堯王泉水又東丹水注之沁水溉田蓋久其易枋口以石門則自魏典農中郎將司馬孚始後一見於河陽節度使溫造嘗奏開懷州古秦渠枋口堰溉濟源河內溫武陟四縣田五千餘頃再見於元懷孟路總管潭澄令民鑿唐溫渠溉田然皆沁水也其鑿丹河以利民不知始於何代考郡志所載沁水凡引爲支河者五丹水凡引爲支河者十隆慶丁卯懷守文安紀大夫誠開創渠河六在沁水曰通濟河曰廣惠北河南河在丹水曰康濟河曰普濟河又引堯王泉爲惠民河此可徵丹沁二河之利

朱之蕃唐安鎮石堤記高平水源發空倉山者滙爲大河經唐安鎮之南夙苦漲溢義民陳騫創石堤患少紓頤堤僅四十丈歲久齧蝕馮公春卽陳堤擴之長八十餘丈高濶咸倍於昔堅固有加自萬歷庚寅迄今二十年而河水屢發竟不能爲患

郭公堤在縣城北元尹郭質築故名柳公堤明知縣柳豸築

縣城逼西山時有水患明知縣劉大實築堤以禦而水泛土潰居民憂之萬歷元年知縣李楨鑿壕引水由南之東抵龍曲村會入丹河



范公堤順治十一年知縣范繩祖築

丹河石堤雍正五年知縣甘士瑛築高一十八尺長六百尺有碑記

橋梁

集賢橋在縣治前順治十年邑人張鑒建知縣范繩祖重修

浮雲橋在縣東關外今改名迎恩橋萬歷三十八年知縣許安遇創建邑令洪聲遠任大僚韋炳相繼重修夏月水漲三就三圯行旅憂之今廢

范公橋在縣南關外順治十五年知縣范繩祖建橋北又

脩石路直抵南關

浚水橋在縣南關外明邑令李楨建有碑記

橫澗橋在縣南三里相傳楊道人建橋北路陡險兩淮益

院張翮甃石成路龐太樸碑記橫澗垂虹八景之一

老金橋在縣南十五里喬村驛驛丞金建

通濟橋在縣南二十里晉豫孔道也明萬歷二十七年邑

民許朝家建歲久傾圯雍正十年知縣胡正履偕朝家

孫貴重修邑人牛道遠記

許河橋在縣南二十里水村河

龍溪橋在縣東南三十里龍泉村南



崇正橋在縣西南十里許唐庄梨園村之交萬歷三十八年知縣許安遇建嗣邑令洪聲遠任大僚相繼修成

迎恩橋在縣西南四十里周纂鎮北

永濟橋在縣東北四十里換馬鎮明弘治四年建

換馬橋在縣東北四十里許換馬鎮北

### 陵墓 坊表

聞之過廟思敬過墓思哀衰草白楊悲風蕭瑟覩茲纍纍良易悽然况死士隴存名流劍掛松楸鬱鬱華表巍巍非止腹痛故人亦且封崇千載豈不樵蘇有禁戶守是嚴也哉三晉爲古帝之都高平則炎帝陵寢儼存時

祭歲修牛羊勿踐至若名賢碩德風流已往邱隴依然魂氣固無所不之精爽自一採難掩九原可作尚不禁憑吊低迴也若乃樹表建坊固乖古制而旂常是列鐘鼎載銘標此芳徽俾人景仰固亦與殘碑斷碣共示來茲矣志陵墓附坊表

### 陵墓

上古炎帝陵在縣北換馬鎮相傳帝嘗五穀於此後人思之乃作陵陵後有廟春秋供祀按一統志帝陵在湖廣衡州府酃縣康樂鄉此特其虛塚云

漢陳龜墓在縣東南龍尾里羊虎翁仲尚存



唐二賢墓在縣北長受村二賢文林郎李恪暨姪將仕郎李亮墓為居民杜氏宅弘治中劬地得壙穴銘石知縣揚子器為居氏地復作墳嘉靖三十九年知縣張鹵復新之勒石為記

上騎都尉李典墓在武鄉村即今唐安岸潰石銘出存里中集鴻砦

宋郎中張維則墓在鄉村即西澤州僉判李之才撰碑

大中大夫張維古墓在通義南秘書正字秦垣撰碑

李常侍墓在董寨村隴西成紀人福王綰之後五代時

曾守澤州遂占籍高平

金李文簡公晏墓在城南許安仁撰神道碑

李襄猷公仲畧墓在文簡公墓側

翰林學士知制誥趙可墓在魏庄東舍利山麓今尚存二翁仲

武寧軍節度使張師穎墓在玉井西刺史侯大中撰表

濮州棘史張國編墓在南陳里

狀元陳載墓在馬村西明萬厯間裔孫陳陞立碑

元廉訪使宋翼墓在高良西學士歐陽元誌

明孝子王敬墓在金峯山東學士曾鶴齡誌子太僕寺丞王燧墓附

光州知州郭質墓在長受里

員外贈太僕卿申良墓在建寧鎮翠屏山



高平縣志 卷之五 陵墓  
大僕卿趙軌墓在趙庄東

工部右侍郎郭盤墓在長受里 勅建侍郎李璣撰碑

工部左侍郎食尚書俸郭鑿墓在長受里 勅建

山東僉事馮顛墓在唐安西

陝西副使常存仁墓在縣城北

陝西布政使左叅政蘇民牧墓在古寨林北

知府劉崇文墓在龐村西

詹事劉虞夔墓在崇文墓側 勅建學士王家屏誌

太常寺卿郭東墓在建寧里 勅建禮部侍郎李廷璣誌

渭南知縣贈僉事忠烈楊暄墓在城西北王庄 編修李

### 士淳誌

國朝大理寺卿王邦柱墓在唐安東禮部尚書胡世安誌

刑部右侍郎加尚書服俸李藻墓在龍從山麓 大學士

### 馮銓誌

贈通議大夫兵部右侍郎李向春墓在城北里側 卽通

議大夫李濬慶墓王鐸誌

湖廣布政司畢振姬墓在得義村

兵部右侍郎加光祿大夫李棠馥墓在城北里

湖北巡撫張珩墓在王河村

浙江巡撫田逢吉墓在通儀里 宰家壇



進士廣西灌陽縣知縣牛兆捷墓在市王村北

坊表

進士 弘治己未進士王錫

三世甲科 勅封大理寺評事楊昇天順甲申進士楊振

己酉舉人楊恒嘉靖丁酉舉人楊紹先

會魁 嘉靖壬辰會魁郭鋈 大司空 郭鋈

拔俊 嘉靖乙未進士郭盤 近侍詞臣 郭盤

司徒大夫 戶部郎中郭鑒

鳴岡三鳳 進士郭鋈郭盤郭鑒

大諫議 禮科給事中趙軌

金榜傳芳 嘉靖丁未進士張雲路 繡衣 張雲路

杏苑鶯遷 嘉靖丁未進士劉崇文

功靖海陬 劉崇文

蜚英甲第 嘉靖庚戌進士牛輓

獻書論秀 嘉靖丙辰進士郭東

曲江並駕 嘉靖乙丑進士蘇民牧常存仁

龍章申錫 蘇實蘇民牧

勅褒諫垣 勅封禮科給事中趙科

藜閣宏儒 翰林院檢討劉虞夔 龍樓匡翼 劉虞夔

東朝元佐 補衣儒宗 蓬山鰲冠 俱劉虞夔

科甲牌坊是  
明朝進士頭  
美觀句不勝  
載乎其人己  
見選本此  
等宜刊



恩湛瓊林 萬歷丁丑進士陳燦

奕葉重光 戶部郎中馮裕僉事馮顛知縣馮春文選司

主事馮養志

雙桂 舉人蘇翥等

京闈進士 順天舉人尙志

五美 都運使畢璽

鴻漸雲衢 嘉靖戊子舉人牛輓

蛟騰滄海 嘉靖戊子舉人郭長

尙賓 嘉靖辛卯舉人邢校

崇賢 嘉靖辛卯舉人郭鑾

經元 嘉靖丁酉經魁楊紹先

亞魁 嘉靖丁酉亞魁張雲路

傳芳 嘉靖丁酉舉人申去疾

文顯 嘉靖丁酉舉人閔承光

龍躍春津 嘉靖庚子舉人邢璉

乾坤正氣 貞烈周氏 舊志所載未必盡存 姑標列之以示來者

按山有定形水無恒軌三代而後紀著之家牴牾不

少非緣考據未精良由形勢有變淵源固在盛衰消

長既已不齊衝徙墊淤支流分合亦靡常所援古証

今未能盡合因來詔往恐誣後人綜其大勢約畧銓



註亦與流傳古蹟存此情形而已至水為大利六府首修而利與害因人事雖有興除造物有時難定山川猶是良費盱衡也噫嘻人往風微古墓犁為田矣風水蒼茫所可考者亦同陳迹附載可稽並坊表列諸山水之末

高平縣志 卷之六

風俗 風土歲時記

記有之命太史陳詩以觀民風命市納賈以觀民之好惡所以審人情而施政化一道德同風俗良必有道矣剛柔恬躁四方風氣攸殊本之於天而醞釀而成者習使然也三晉勤儉有唐虞遺風高平近太行之麓水土深厚人性質樸士亦彬彬陶冶而拊循之駸駸乎行見風會日上矣若夫歲時伏臘敦本睦鄰禮循習尚鄉隣風俗之美亦或寓焉司風教者因民而治默為移易詎不有微權歟為志風俗並記風土歲時



風俗

淳而好義儉而循禮勤于力田多嗜文學祝志

其民儉朴而敦本有唐晉遺風元志

生齒稠密土壤豐腴舊志

堯舜之畿輔河朔之咽喉明書院記

四郊東務農西服賈南尚角較北安椎魯昔稱勤儉今漸

侈靡而多畏法度至重農桑善積聚恪奉公又俗之美

者也范志

風土歲時記

禮節自朝賀祭祀迎春鄉飲載在會典者不具錄

婚禮問名納采請期庶民同用惟納吉納徵親迎則士大

夫行之

喪禮俗尚漸侈又多泥堪輿家說故有淹柩甚久者自含

殮至下窆品物芻靈多務華炫宴吊客筵必豐腴葬後

行復三禮客恒數百人飲無算爵最為靡費記曰孰若

禮不足而哀有餘力挽頽風當必有一二士君子起

祭禮士夫祭主祠堂祭墓惟春秋二舉民祭於墓者多

元旦五鼓興焚桑柴响紙炮潔牲醴祀神祭先拜尊長戚

里往還慶賀讌會數日

上元懸華燈列爐燄火光騰灼簫鼓喧闐裙履丙夜嬉遊



高平縣志 卷之六  
三更乃止十六日鄉城男婦趨走金峰山以艾炙石佛  
云祛百病

清明携楮錢酒榼男女拜掃墳墓

端午飲雄黃酒戴艾葉繫續命縷交餽角黍

七夕女子設瓜果醕醢祭天孫織女以乞巧

中元祭掃如清明以麻穀掛門上

中秋戚友以瓜餅相餽遺月下剖瓜佐飲

重陽登高聚飲

十月一日楮錢象金冥衣羹飯祀祖考曰送寒衣

十二月五日黍豆和煮爲粥曰五豆粥八日煮之曰臘八

二十三日掃舍宇設飴糖祀灶

除夕掛門神貼春聯士夫間小集守歲

春祈秋報禮也城鄉迎神賽社鼓吹鳩衆戲優雜選按

月恒有東關每年四月八日祭賽炎帝大會十日九月

十三日祭賽關帝於炎帝廟內諸貨駢羅遠近士女雲

集其餘米山各處賽會尙多不必悉載

物產

五方風土從古異宜蓋山川原隰形勢不同氣候早晚  
亦遂殊致物產因時與地誠有不能強致者高平隸上  
黨高原四塞地脈甚寒歲惟一孰固乏瓌特珍奇而民



食所需以及草木鳥獸之屬雖皆習見要亦天所生以  
養萬民者也用天之道制地之宜民生斯土亦惟當知  
力出於己貨不棄於地而已不貴異物賤用物詎不有  
古訓歟志物產

穀之屬 黍有青黑紅白數種通志云羊頭山有黍二畔  
其南陰地黍白其北陽地黍紅因之以定黃鐘陰地黍  
白乃高平界也隋律志曰上黨之黍有異他鄉其色至  
烏其形圓重用之爲量定不徒然 稷卽糶米也似黍  
而小其色黃土人稱黃米爾雅翼稷者五穀之長故以  
名官其祀與社配五穀不可徧祭祭其長以該之 粱

一名稻秫種來自蜀一名蜀秫土人又稱菱子有紅黑

白三種

穀黃白青紅數種脫殼則爲粟米亦曰小米

春秋題辭西乃金之位米爲陽之精故西米爲粟舊志

高平所出之粟精潔美腴甲於他郡 麥有大小二種

又有別種曰蕎麥秋種有紅黑斑三種 豆卽菽也種

類極多諺曰穀三千麥六十豌豆八扁二豇十一蓋豐稔

之驗也 麻有四種

果之屬

葡萄黑白二種

核桃

雁過紅卽虎刺賓

銀杏

舊志按果之產同於他邑者不復贅入惟此數

種爲異



蔬之屬 蘆蕨有大如甕者 蒿苳 蒼葢 藤蒿 山藥 舊志按邑澗溪沿汴之毛與他邑同者不載惟此五色為佳

草之屬 潤草 間有紫蝴蝶 剪紅羅 綉墩草 木槿

水紅 菊 芍藥 舊志按邑素無奇花茲特標數種

以備觀覽

木之屬 檜 楸 桑 楊 椿 舊志按邑水深土厚

木產多艱餘同他邑者不載

藥之屬 蒼朮 黃芩 桔梗 防風 連翹 酸棗仁

甘遂 遠志 石膏 兔系子 赤石脂 山查 欬

冬花 禹餘糧 舊志按邑之藥僅有數種然亦非珍

異也

羽之屬 雉 鶴 鷓 啄木 畫眉 鷓庚 布穀

紅嘴鴉 青田田 舊志按邑山高澗廣鳥鳴山谷者

不及遍載志此數者亦洛陽審音之意

毛之屬 狐 獾 狼 鼠狼 舊志云餘同他邑者不

入

貨之屬 絲 紬有雙線單線兩種 鐵按本草太原澤

州陽城高平廣靈為尤勝畢振姬讀鹽鐵議生鐵伐鑛熾炭為之鐵成而加薪乃熟熟可鍼刀耒耜鋤鑿鑿



釘鑄打作之屬利熟生可駁砲鐘鼎鍋鑄作之屬利  
生生熟間爲錠爲鋼鋼又南北之鐵混鎔也可鋸可錯  
可鑿且鑄且打之屬利生熟 石炭通謂之煤張鳳翼  
晉國賦冀北之煤連綿大麓斷礮研岩摩肩擊轂五方  
絡繹以奔塗萬灶所燠而轉煥朱弁坑寢詩西山石爲  
薪黝石驚射日方熾絕可邇將盡還自續飛飛湧元雲  
燄燄積紅玉稍疑雷出地又似風薄竹于謙詩但願蒼  
生俱飽煖不辭辛苦出山林 舊志按邑原無奇貨獨  
煤炭甲於天下

按唐魏之風儉嗇高平昔稱好義循禮是亦採風者  
所樂觀也願禮陶樂淑上之風教有心下之習染亦  
慮其難革牽車服賈征逐刀錐人有競心矣民安恒  
產士勉恒修還淳返朴是所望耳况土厚風淳物力  
猶是今寧必異於古所云耶



高平縣志 卷之七

公署 屬廨倉獄等

昔季路治蒲孔子入境而三善之君子讀其言惕然有靖共之思焉蓋縣官表率一邑責重權尊非止臨洿堂皇侈然謂得爲所欲爲也生民休戚總持一身公府雖有內外之分四郊寔不異几席之下南面以聽地示尊嚴凡茲官守不容廢缺七月之詩曰躋彼公堂稱彼兕觥民亦瞻仰而趨承之矣自斯而外經營建置胥關吏職以宏規制以聳聽觀事不煩而交飭是亦不可不詳也志公署屬廨倉獄等胥附焉



縣署

宋開寶六年縣令楊咸弼建明洪武三年縣丞潘珪永樂八年知縣李規嘉靖年知縣王準劉大寔衛東吳傳思明萬歷年知縣張居仁劉應召天啟年知縣喬淳崇禎年知縣魯光國相繼增修

國朝順治年知縣范繩祖加修白良玉重修縣治內宅譙樓兩司舊治益擴知縣宋思陟修六房 縣治大門外正中照壁東西柵欄大門三間東西角房各一儀門三間東西角門各三間中路 御銘亭一 上諭亭一東吏戶禮三房皂隸班房每房各三間西兵刑工三房快

手班房與東同丹墀東西皂隸房各一 大堂三楹東贊政廳西總科各三間後仕優門 二堂三楹東守門房一庫樓一買辦房二間民壯班房三間西庫房一間銀匠傾寶房五間 宅門內三堂五楹東西門房各三間堂東正房三東房三又東院書房五楹東西房各三間東園花庭五楹六角亭一 堂西書房三楹右室三間茶房三間又西小院書室三楹屢房二間此一院乾隆三十七年知縣傅德宜新建 四堂告帝樓五間東西樓房各四內東院廚房三間東房五間 內西院正房三楹西房五間 自宅門內皆乾隆三十六年知縣



傅德宜重修 大堂東鄧侯祠內正殿三楹東房三間  
西房三間乾隆二十四年各房吏書王世華等出資稟  
明知縣黃 新修 大門內西院衙神祠正殿三楹西  
房三間乾隆三十八年知縣傅德宜重修 大門外東  
院

關帝廟正殿三楹東房三間戲樓一座舊基在大門內西  
院前任吳改建於此 署西北隅馬號內 馬王廟三  
楹捲棚三間廠棚十六西房五間乾隆三十七年知縣  
傅德宜重修

縣丞署舊在堂東今廢

主簿署舊在堂西今廢 舊有寅賓館衙神祠在大門  
東俱傾毀

典史署在儀門內東大門一東西耳房各一西

關帝廟三楹東馬房一大堂三楹東西耳房各一 二堂

三楹東西房各三間 內堂三楹東西耳房各一 廚房

二間 東院書庭三楹

察院四所 縣治東 南關 長平驛 喬村驛今

布政司分司在縣治西

按察司分司在書院巷 理刑公署在雙桂坊

陰陽學在縣治前 醫學在縣治前今俱



僧會司在準提庵

道會司在城隍廟

長平驛丞署在長平驛

喬村驛丞署在喬村驛

今俱廢

倉廩在縣署西北共十九座計六十七間內九間乾隆三十八年知縣傅德宜重建

社倉四 本城崇果院 米山鎮 寺庄鎮 馬村鎮

又乾隆五年奉文添設社倉四處 野川鎮 河西鎮

陳堰村 北 詩村

義倉四處 仙井村 北陳村 王報村 赤祥村

獄在縣署儀門內西堂廩五西廩五東房三外堂房三

觀音堂一獄神閣一女獄堂廩三禁卒房一

養濟院舊在縣治西年久傾圮雍正七年奉文修葺知縣胡正履移設南關並添設普濟堂捐貲修建有案

留養局七 南關廂 米山鎮 寺庄鎮 河西鎮

喬村驛 店上村 馬村鎮乾隆十二年奉文于縣屬

通衢以及鎮集設立每年十一月初一日開局遇外來以及本地無告窮民收入局內留養春間資送回籍乾

隆二十二年知縣黃有恒捐置地六十一畝收租以備費用報銷在案

漏澤園 東關舊志載今廢



壇廟 祠祀 寺觀

壇壝廟貌所以昭格明神爲民錫福必分相屬而後精神相通古者分茅胙土國有常祀今之一邑提封百里亦侯疆也詳覈會要大典集禮諸書盼蠻所存足以呵護捍衛乎一方者報享有必舉蓋大事在斯誠不可不詳其規制以昭令典凡以嚴幽明之分庇茲黎庶也典禮有經罔敢廢缺非徒神道設教聳世聽觀若佛老之宮奔走崇奉在在皆是土風相習亦採著之志壇廟祠祀附寺觀

壇廟

先農壇 在東關外雍正五年 詔重農課稼令天下

郡縣守土官率於仲春上旬亥日出郭耕藉以勸農工立壇祀知縣甘士瑛建正殿三楹配房四間大門一座四圍墻垣藉田四畝九分行耕藉祈穀禮

社稷壇 在西關外明洪武初建而不屋臺陛各三級北向 社左 稷右以木主之祭以春秋仲月上戊日禮用牲帛望燎三獻週圍墻垣係土壘乾隆三十四年知縣虔禮寶捐俸包以磚石有記

風雲雷雨山川壇 在南關外洪武初建制如社稷 風雲雷雨居中 山川左 城隍右以木主之祭用牲帛



加社稷一壇者秋仲月上戊日望燎三獻週圍墻垣係  
土壘乾隆三十四年知縣虔禮寶捐俸包以磚石有記  
八蜡廟 在南關外萬歷十年知縣劉一相改建於舊址  
之西春秋仲月上戊日祭 禮郊特牲歲十二月合聚  
萬物而索饗之八神 先嗇神農也 司嗇上古后稷  
之官 農古田峻有功於民者 郵表畷田畔相連畷  
處造為郵舍田峻居之以督農者 貓虎貓食田鼠虎  
食田豕皆有功於農 坊坊堤也以蓄水亦以障水  
庸庸溝也以受水亦以泄水 昆蟲亦貓虎之屬曰蜡  
年終祭名

邑厲壇 在東關外每歲清明日中元十月朔祭無祀鬼  
魂移 城隍神以主之 子產曰鬼有所歸乃不為厲  
祭法祀無後者明置厲壇有大厲國厲郡厲邑厲鄉厲  
等

社厲壇 在鄉鎮今廢

神農廟有三 一在羊頭山曰上廟為神農嘗五穀處一  
在換馬嶺曰中廟有神農虛墓有司春秋致祭一在東  
關曰下廟近改祭於此

關帝廟 在儒林坊府志止載西關今春秋及五月十三  
日祭祀俱在此廟內



護國靈祝王廟 一在鴉兒溝一在西關一在小北庄世傳祀后羿神司冰雹多靈應

骷髏廟 在城西五里秦白起坑趙卒於此唐元宗幸潞州擇枯骨中巨者立像封骷髏大王命有司春秋致祭累朝因之廟前池有大魚人或觸之即生災

城隍廟 在縣治西金大定年建明知縣楊應中田景新劉廣國重修順治十五年知縣范繩祖捐銀重建大殿香亭舞樓門廡等一時俱新士民張濬張顒焦永昌張翔各捐金助大工歲於春秋上旬日題主於南壇與風雲雷雨 山川神並祭廟會專祭

朗公廟  
已名額古  
張身

濟瀆廟 有三一在建寧鎮一在骷髏村一在陳堰陳堰廟有古檜數千年物也

朗公廟 在縣北永祿祀倉頡

湯王廟 在南門內

張儀廟 在鳳翅山

崔府君廟 在縣城西門內舊志神諱崔表唐時為長子

令惠愛及高平故為立廟

玉皇廟 有三一在米山鎮一在龐村一在王庄

東嶽廟 有二一在米山鎮一在同山北里

元帝廟 有二一在西關一在北里



三官廟 有二一在城東南廂一在東梓城

文昌樓 在南城樓知縣王省身建

文昌閣 在南關進士楊暄建有碑記舊志

金龍四大王廟 在南關神諱謝緒會稽人憤宋祚移沉

淵而死後助明太祖破蠻子海牙封為金龍四大王

五龍廟 在王河宋大中祥符間五龍見於丹水故立廟

靈淵王廟 在七佛山下宋時賜封號禱雨多應

二郎廟 在南關舊志神諱趙昱隋時入水斬蛟傳為治

水之神鎮邑西山水楊暄李鐸重修

孫真人廟 在米山鎮祀孫思邈

白衣觀音閣 在東城樓知縣王省身建

二仙廟 在趙庄即樂氏二女

懸壺真人廟 在回山北

祠祀

關帝

三代祠 在儒林坊關帝廟雍正三年知縣甘士瑛奉文

建祀

光昭公

裕昌公

成忠公



節孝祠 在縣治西雍正五年知縣甘士瑛建祀 元李

鳳妻王氏 張國用妻許氏 張珊妻曹氏 段傑妻

姬氏 王平妻張氏 明邵深妻璩氏 張友讓妻王

氏 邢國庶妻趙氏 牛學孔妻張氏 王子章妻李

氏 李韶妻邵氏 牛天賜妻梁氏 陳鳳妻李氏

尙洗妻烈女李氏 龐賜妻陳氏 邢琰妻李氏 邢

光裕妻邵氏 劉虞夔妻畢氏

國朝 李海妻烈婦范氏 烈女張四姐 烈女郭大則

祠宇墻垣歲久坍塌乾隆三十四年知縣虔禮寶捐俸

重修有記

馬將軍祠 在原村祀元處士馬海明嘉靖勅封事詳碑

文

七賢祠 在叢桂北 今廢

又舊志載

郭公祠 東門外元縣尹郭質今廢

楊公祠 一在南門一在建寧鎮知縣楊子器

董公祠 西門外知縣董琦

孫公祠 大成街縣丞孫應奎今廢

劉公祠 西門外知縣劉大實

張公祠 南關知縣張鹵

七賢應列其名



高平縣志 卷之七  
劉公祠 南關知縣劉堯卿

李公祠 南關知縣李楨

馬公生祠 南關知縣馬從龍

王公生祠 南關知縣王省身

劉公生祠 西關知縣劉應召

任公生祠 南關知縣任大僚

魯公生祠 南關知縣魯光國

王公生祠 南關知縣王漢

韋公生祠 一在東關一在湯王頭知縣韋炳

范公生祠 南關知縣范繩祖

按舊志分載專祠幾二十所各有其地中有生祠非古也一時建立存廢難稽邑自有名宦祠果德澤在人自當附入專祀正不必也

寺觀

崇果寺 縣治南大成街舊名隆教宋太平興國二年賜

今名明洪武間重修置僧會司登閣而眺游仙米尖諸

峯悉出檐下本寺有藏經

崇壽寺 縣治西鐘樓巷背視韓王山若負展然

慈教寺 縣南二十里游仙山

法雲寺 縣北二十里韓王山上方古刹如出天際



雲月寺 縣東七里七佛山有石佛七唐時鑿像甚奇古  
興隆寺 縣東二十五里詩午村北

金峯寺 縣西三里金峯山一名靈巖

慶安寺 縣西十五里野川鎮

興明寺 縣西三十五里上馬遊村西

龍泉寺 縣西三十五里杜寨村北古榭排雲幽泉落雨

石瑋有山樓記

定林寺 縣東南十里大糧山峭石寒泉清幽絕俗

崇明寺 縣東南三十里孝義村南

招雲寺 縣東南三十里龍從山

吉祥寺 縣西南三十里卧佛山山門第一松號奇絕游

人題咏本寺有藏經

資聖寺 縣西南四十里周纂村

華嚴寺 縣西南四十里庄頭豁谷幽邃松柏陰翳

開化寺 縣東北三十里舍利山

法興寺 縣東北四十五里龍王山

清化寺 縣東北四十五里羊頭山

普照寺 縣西北三十五里石室山伐石成龕列石作嶂

鳩山寺 縣西北四十里傘蓋村北

準提庵 南關順治十三年知縣范繩祖建



仙姑庵 縣西四十里董峯山

瑞雲觀 縣治西南隅舊在城東名白鶴觀唐開元二十

七年建後水沒徙今地更名瑞雲明洪武間置道會司

東華觀 縣南三十里焦河村

顯聖觀 縣東南十里米山鎮

洞真觀 縣西十里王降村

玉虛觀 縣西三十里良扈村

猶龍觀 縣西四十里董峯村北山環水繞閭無人寂

清真觀 縣東北三十五里安河村

清夢觀 縣東北三十五里石村

天真觀 縣西北三十里西珏山

按堂土鳴琴四郊化洽公府者政令之所出土民之所仰也外此事關營建廢置亦或靡常而有其舉之要不可不整齊嚴肅以示政體至神明所依非福澤在人即禮制攸繫典司一邑所以洽崑明而通上下寧不在是歟學道愛人甄陶移易琳宮梵宇之奉民亦將漸息矣起化有原武城單父詎非先軌耶



高平縣志

卷之六



